

先考越邨府君行述

趙 樾 邨 先 生 遺 像



樾村趙府君行述

府君諱藩字樾村一字介庵別號蟠仙晚自號石禪老人劍川河
湖村趙氏系出宋燕懿王德祐間諱由坦公字順甫者以字行從
宗長翰林學士與惡至元丞相伯顏軍中講解被留社屋後達魯
花赤愛魯辟爲幕僚偕至雲南任大理寺處都元帥府副使遂家
於劍川傳十九世至 先高祖贈光祿大夫諱懷禮諸生妣王夫
人 先曾祖贈光祿大夫諱琦妣陳夫人段夫人 先祖贈光祿
大夫諱聯元附監生議叙同知銜候選州判重遊類宮以急公興
學旌獎建坊妣李夫人王夫人 先祖生子男二長卽 府君李
夫人出次 先叔諱荃字湘皋王夫人出丁酉科舉人歷任四川

鹽邊廳通判雲南蘭坪屬關文山等縣知事以辛酉秋卒於昆明
寓廬 府君生而奇慧五歲授書過目成誦有神童之稱家富圖
籍胚胎庭訓年甫十六七經史有用之書涉獵殆遍下筆千言議
論宏偉郡中先達楊杏泉大令李蘊川孝廉陳復庵處士皆譽爲
命世才時滇中回匪搆亂已七八年郡邑被寇所在騷然 府君
侍先祖奉 先曾祖妣轉徙避亂活無寧處而仍不廢學同治戊
辰 府君年十八矣回匪以全力攻圍雲南省垣三迤州郡淪陷
殆盡 府君憤賊焰之猖狂憫民生之塗炭與族叔敏堂先生秘
謀糾約邑中忠義之士歃血定盟自捐餉餉恢復桑梓爲釜底抽
薪之計以遙解省圍遂於戊辰五月五日用蠟丸書密約護維西

協副將張公潤內外夾擊襲復劍川城分兵規取麗江鶴慶所謂
北路義師是也然我兵新集糧餉不時濟而賊援大至竭力戰守
者五閱月奸人應賊劍城復陷敏堂先生闔門殉難府君舉家
避之麗江巨甸里後與張護協收合敗殘經營數月進規麗江克
復府城繼克劍川州城分規鶴慶浪穹鄧川而永昌騰越順寧緬
甸諸路義師亦颺然響應賊東西奔救竭蹶不遑省圍以解師行
大順北路義師得與諸路聯合二年之內遂連復數十城合圍大
理掃穴擒渠全滇肅清凡北路一軍運籌決策草檄飛書皆府
君綜其事一時有小諸葛之目府君顧恪守庭訓不廢讀不妄
殺不取金帛不邀獎叙專以完滅賊拯民心事凡遇奏凱開保皆

堅卻之亂平年廿二矣始橐筆應試冠其軍補弟子員次年試優等第一經古第一補廩餼又次年中式光緒乙亥帶補壬戌本省鄉試第四名舉人兩赴春官試薦不售就四項教職候銓選授易門縣訓導易門去省治僅三日程鹽法使者鍾公念祖 府君郡試受知師也知易門學有二齋一教諭足治學事啓於大府聘府君佐鹽署幕府 府君遂於履任後至鹽署襄事而與易門諸生約學課試卷郵寄評閱學署租穀雜項悉以奉東齋一無所取如是者有年十樂其評隲之精允東齋亦樂其崇讓而濟窘也時論歎爲從來冷官所未見曾大計蒙撫院譚公疏薦卓異署考曰枕經蔗史矜式士林咸謂褒如其分無一字夸詡云制府西林岑

襄勤公深器

府君使幕僚全庶熙廉使女夫唐珮瑗直牧屢道

意致幣聘

府君以鍾公相遇厚婉謝之至鍾公引疾去官後乃

就襄勤聘司牋奏並爲諸子講討歷史謚正文字終襄勤任相得

其歡

府君崇廉持正是非所在謇諤不阿襄勤以是尤深敬服

每謂諸公子曰趙君學問閎達固是通才其立心制行正大敦厚

余所見僚友殆無其匹余身後事終當託之汝輩所宜敬事其誠

之勿忘厥後襄勤薨於位遺疏喪禮一切巨細皆

府君經畫井

井有條無一滲漏是時幕友星散中丞譚公兼督篆仍聘

府君

綜牋奏

府君陳明受襄勤深知當始終其事譚公亦動容稱歎

人以是服襄勤之知人

府君之酬知均非尋常所能窺測也先

是府君以訓導俸滿見制府劉武慎公爲畫策平雲州劇匪石炳元叙功保薦以知縣候選嗣佐襄勤幕爲畫策平順寧探黑夷匪改置鎮邊廳叙功開缺免選知縣以直隸州選用加知府銜至是送襄勤喪歸粵後乃請咨入京候選復兩應會試報罷計先後六應會試四薦不得售府君已無復科名之志襄勤諸公子助之貲乃遵例指發四川需次到省後充籌餉局提調次年奉檄署西陽州時州及所屬秀山新有教匪之亂辦理失平地方殘破豪猾復藉以訾怨買言官彈劾大獄以興官紳惴恐綱紀頽壞盜賊滿野人心搖搖府君叱馭而往受事三日卽輕騎至秀山之捕豪猾撫綏元收下移之權歸於牧令出示練團緝匪有持刀遊

行者嚴治之八日而秀山大定人心安堵奉制府定興鹿公秘檄以密奉廷寄鈔發言官彈劾疏交查頭緒紛繁羅織轆轤府君一一如原疏按察具得虛實一無假藉據寔復陳鹿公覆奏至京之日言官亦適以贓敗奉旨查辦核寔著無庸議良愿被保全者無算風波既定府君乃盡心治理下教求言具得利病裁革書吏向納於官之規費二千餘金約之以法遂不敢肆日坐堂皇收詞聽訟明察情僞判決平允顧不自喜每事參以化導至誠惻怛多有警省感激因以罷訟者初至日聽廿餘案率至夜分三月後日不過十餘案半年後日不過三四案終任凡結新舊二千餘案民自以爲無冤月必按行鄉鄰三四次從役四五人飲食自備所

至存問父老勸勵士農而調察奸詭盡法懲治椎埋之徒聞風遠
避有鼠雀之爭就與平之鄉氓以爲數十年所未見西之士子多
刻苦嚮學惜多寒賤又鈔藏書 府君捐廉簞歛購經史子集八
千餘卷置之西書院供多士鈔閱復立經古時務課月舉三次
躬自評閱優予獎勵學校奮興爭自濯磨得通經致用之士十餘
人餘亦粗知學問門徑風氣大開吳移香學使按試至西所取士
皆 府君獎拔前茅者學使與 府君爲同年生試畢譙於公廨
學使王巨觥爲 府君壽曰所以酬賢太守教課有素衡鑑有真
也 府君笑而乾之州東被雹災州城被火災損傷至鉅 府君
皆捐廉數百金復請帑勸募親爲賑恤民無失所瓜代而去士民

攀送自州城以至龔灘凡三日程香花載路老稚依依 府君亦
眷眷如去鄉里也至涪州奉檄留筦官運鹽局不兩月制府鹿公
電調晉省檄委督辦川東土稅釐總局 府君以不嫻會計堅辭
鹿公謂總辦之職在知人善任規畫大利害持籌握算自有司存
以君廉明知大體故以畀君君其無辭 府君則陳三事一請各
分局委員無論正佐得自爲選派以重事權一請以總辦餘平公
費均之委員以養其廉一請移總局於涪州以握土藥之總匯鹿
公慨然嘉許曰一切假君便宜吾但以有無成效與功過君勉之
矣 府君馳赴萬縣入局受事卽出巡所屬局卡周歷二千餘里
地勢商情員司賢否察訪明確分別釐剔別定章程與各委員約

曰今總辦餘平公費已陳明制府與諸君均之足以養廉舊日總局札費節禮各陋規一律裁革足以省累繼自今宜一心公家核寔稽征以益帑項嚴禁書巡婪索以恤商艱功罪所在毫不假藉各聽自擇而已遂移局涪州綜理督征先是此局爲某太守窺開稟定六成征收而寔征四成規制草率上下相蒙因緣爲奸利橐滿遷去又薦其鄉人某太守爲代踵其故習變益加厲賣放苛罰率歸中飽鹿公廉知其獎混故履任卽以雷仲宣太守往易之雷太守求治心急而未盡得其要領出以操切打卡之案疊出故鹿公復選擇而用 府君且以涪州而上至叙府各土局皆歸併綜理 府君至後去貪劣革陋規定章程耳目一新惠事求是委員

司事奉法惟謹土商無需索留難之病繞越日稀乃獲征足六成
行之一年征欸所入贏前二倍而部章通飭征足十成商情疑阻
觀望辦理甚艱龐公憂之原許府君一年有效當以瀘資大州
酬其勞勩至是復手書獎詔府君而勗以力爲其難征足十成
以需後命府君乃瀝陳商艱寬留除皮隱寓體恤以期集事龐
公允之商情欣悅征收無梗果足十成行之半年又益贏數十萬
而龐公忽爲某將軍所擠開缺以去將軍故習聞龐公許以大州
酬勞之語使人諷府君以五千金爲壽當委權瀘州府君婉
謝之尋具牘請假省親歸慎司道諸公惜府君之去而慮其不
復出也則檄查滇黔土商改道情形以縻之府君至家循陔侍

養不欲復出會庚子京師之車駕西巡滇亦假擾滇督丁循卿制府滇布政李仲山方伯乃走使速府君至昆明檄委會辦全省團營以固邊圉迨和議寢有端倪慎防解嚴復檄委府君資護貢品赴西安行在府君至陝目擊秦晉奇荒悉索家貲以萬金助賑經岑雲階中丞入告奉旨以道員仍留川補用引見後蒙召見一次回川需次時川商行鹽濟楚受制於沙市宜昌行戶目行折閱川督奎樂峯制府奏委府君赴沙市創設保商總局鄂督張香濤制府與奎樂峯制府有違言府君擬保商章程六條往見張公瀝陳設局於川鄂交益義正而詞婉張公意解得開局辦理規模大定主客協和商銷頓暢不三月府君奉川督岑公

雲階電調回川署鹽茶道兼綜理通省釐金迺薦何棠觀察爲
代踵府君成法行之兩年商欠七十餘萬陸續收回歲有贏濟
楚根基始穩固不搖公私交益至今猶稱道府君創成之功云
府君之至成都也岑公事無不問府君亦知無不言匪黨之
強弱分合官軍之戰守勤惰吏治優劣民情欲惡府君言之岑
公采而行之一時如嚴鷺之掃秋箨甘雨之起槁苗又如明鏡之
鑑形平衡之權物糜濫之蜀不三月復轉爲治安岑公握其綱
府君司其隱也於是始開辦四川學務警務工業武備諸新政學
堂而理財所最注重則鹽道計岸仿照滇黔改辦官運一事岑公
欲竟丁文誠未竟之志詢謀互有異同岑公銳意爲之繼鹽道黃

君權臬符而以鹽篆畀府君寔倚以創成官運府君選用廉
能開局署側昕夕籌議規畫兩月而宏綱以立細目具張事體大
定岑公欲重留府君久署以觀其成府君以規模既定但得
持守無懈自可觀成不欲久溷腥羶損其志趣力啓岑公檄黃君
返任聞者歎異岑公亦謂爲卓有古君子之風也岑公疏薦府
君廉正平寔宏遠精深曩辦土稅解欸增倍現綜鹽茶釐金剔除
積弊嚴而不苛求之近日監司寔難多得請破格錄用奉旨交軍
機處存記府君既卸鹽篆岑公奏委總辦滇黔官運局未行而
改委署理川臬聲明俟卸署任後到局局事交會辦張宮甫觀察
代理包封判行不領薪水岑公皆許之府君署臬五閱月兼綜

學務辭去釐金於進退人材提點刑獄造就師範整理巡警多所
規定自護院陳公鹿笙以至監司諸君靡不敬而愛之苟且之政
甫萌芽而卽摧苟且之心未宣露而自止者蓋不知凡幾也既卸
臬篆奉檄赴爐領鑪局 府君以爲滇黔邊計官運鹽務丁文誠
創辦宏綱細目精核詳密具在方冊行之廿餘綱成效昭著法已
盡善惟人才凋謝寢成徒法故亟亟以剔汰委員司事之庸濫者
而延攬廉幹者爲下手先着又以隄富兩廠火衰炭貴而征欸日
加鹽費銷疲廠岸交困以酌劑維持恤灶恤商爲固本要圖凡綜
理四年有餘征欸皆有贏無絀制府錫公疏薦謂沉靜有爲寔心
任事熟諳鹽務區畫精詳奉硃批傳旨嘉獎此四年中一權永寧